

佛說阿闍世王經

後漢月支三藏法師支婁迦讖譯



清刻龍藏佛說法變相圖

佛說阿闍世王經卷上

惟五

後漢月支三藏法師支婁迦讖譯

聞如是一時佛在羅閱祇者闍崛山中萬二千比丘俱菩薩八萬四千一一尊復尊諸菩薩摩訶薩悉得諸總持悉得無所罣礙悉得無所從生法而得如三昧慧悉得知一切人心之所行如所欲以法教令各得其所諸四天王及天帝釋釋天及諸天子龍閼叉捷陀羅阿須倫迦留羅真陀羅摩休勒人非人悉來會時文殊師利在山一面異處與二十五上人俱何謂二十五人者悉是菩薩各各有名名曰若那師利那羅達師利三波師利劫波頭師利波頭師利劫闍陀因陀樓陀羅尼陀樓羅陀波尼羅陀牟訶多私訶末師訶惟迦闍俱羅伽那迦闍沙訶質兜波沉摩遮迦

波括鎮遮薩和波陀波坻槃拘利沙竭末摩訶魔樓耆非陀遍阿難陀譬又波買耆羅耶阿難陀阿藍惟訶羅摩坻吒沙牟迦坻陀阿俞達薩和頌悉是爲二十五上人名四兜術天子來到文殊師利所欲聞法故其天子名沙摩陀鳩遯摩羅無拘遯摩漫那羅捷陀沙訶漚術曇惟訶是爲四天子復有異天子少來到文殊師利所欲聽法故上人諸天子悉坐各各說佛智慧甚尊無有極不可議不可度不可量不可以凡而應僧那皆言當何

作法證方便而至無極智慧乃至佛一切智不可議慧首菩薩言於功德無有厭於諸功德無所希望作是者可至無極慧惠施菩薩言等心如寂其心悅懌柔輒自隨其教便持薩芸若心而堅固於僧那僧涅作是者可至

無極慧具足平等菩薩言不計校劫數其當來劫無央數不可以爲計是爲僧那於僧那不自貢高作是者可至無極慧具足行菩薩言不自念安可至無極慧所以者何欲令一切皆安故作是念者不求復悉安一切作是者可至無極慧蓮華具足菩薩言其不自伏意者亦不能伏他人意其能自伏意者乃能伏他人意作是者可至無極慧蓮華具行劫菩薩言其有隨欲者不可度欲不隨欲者是乃度欲其菩薩者有得利不得利其心無有異若苦若樂若謗若歎若惡若善於是無所著所以者何亦不憂亦不喜作是者可至無極慧制持諸根菩薩言不念他人作功德我可得作是者不入無極慧當念獨而無有伴所以者何念於一切故諸不辦者我當辦之

須臾之精進不以懈怠欲教一切作是者可
至無極慧持行如地菩薩言譬若如地一切
草木藥舍宅城郭無不因地而住者地亦無
所置一切仰而得活亦不以爲煩苛菩薩者
亦當如是持心當若地亦不喜怒持心當令
一切各各得其所亦不念還復其作是者可
至無極慧寶願菩薩言當持心如尊不自卑
於夢中亦無二心所以者何無羅漢辟支佛
意其所作者譬若如寶不離薩芸若不失一
切人心於珍寶心無所貪惜其從索者皆開
導爲摩訶衍所以者何無心與心等者無心
慧與是心慧等者亦無所增無所減其心無
所貪惜作是者可至無極慧寶印手菩薩言
視五道生死人譬如墮海菩薩若心而愍念
之當以手授之所以者何爲無黠者作黠首

其貪者爲作無所惜首其不持戒者爲作戒
首其瞋怒者爲作忍辱首其懈怠者爲作精
進首其亂意者爲作一心首其無慧者爲作
智慧首其無功德者爲作功德首以功德首
印三法寶何謂三令一切具足佛智慧教化
而造作自解其身珍寶功德念一切諸法譬
如空是故爲法寶之首是爲三其作是者可
至無極慧師子意菩薩言其身作是僧那者
無所恐懼亦不畏亦不却亦不解衣毛不復
起所以者何於生死無有惡故亦不作於泥
洹等住於苦樂不作二心作是者可至無極
慧師子步過無懼菩薩言其弱劣者不能逮
此皆是夫士之所作所以者何以捨衆惡以
不諛諂以應質朴則不貢高無瞋恚之心所
作不從非法所以者何用忠正故則無姪洿

以無惡心其愚癡若冥以無此者其身口意以平等所語如語不失其意甚尊所作欲成所以者何用至誠故俱以法自娛樂以如法者不貪惜壽命所以者何不貪軀命不捨一切故所施與無所貪惜欲令人得其所故所入者正則非邪道其貧者爲作珍寶藏其有病者則爲作醫其恐懼者則爲作護其劣者則爲作道地其入邪者則爲作正導其無智者則爲作智一切諸順何所恨起意大士以度脫此中忍所受法本如住作是者乃至無極慧紫磨金色菩薩言所念譬如空所以者何無所不徧以大哀無所不覆其心常喜面顏而悅諸欲所樂者其心不在其中所施與譬如天無所不蔽其戒忍辱精進一心智慧亦復如是作是者可至無極慧發意即轉法

惟五

四

輪菩薩言其有新發意者不當令魔得其便不失諸佛天神意作心住者以應法輪轉所以者何用發好心故所以者何一切諸法無所生其作是者可至無極慧諸語自然普無不入菩薩言當持心無所不入所以者何諸法自然其本悉空一切所語皆空譬如虛空無所不入菩薩者當復如是其心無所不入有所作如語其智無所不曉其作是者可至無極慧樂不動菩薩言諸所有音無有音諸所有聲而不可得以知是者亦不以喜亦不以憂亦不懈怠所以者何譬如大山而得風亦無所動諸好音惡音菩薩心亦不喜歡亦不以憂感所以者何無所著無所著謂佛語若異道語俱空無所有視諸欲有所作者皆有盡以知盡而不貢高作是法者疾成至佛

惟五

五

海意菩薩言其心當如海所受慧而無極譬
如海受於衆流合爲一味菩薩以諸所有合
爲一法所以者何用微妙故不與十二因緣
有所變念法身亦不增亦不減爲一切作功
德所作功德欲令一切皆得是爲不可盡功
德當護不著不斷以意力制身諸所有所作
皆等無有異作是故發意慧者具足可至無
極慧大光明菩薩言當持心其智慧其光明
如佛非俗人之所作其意習光明無所不照
所以者何欲令世間知以爲法則其意習施
與光明無所不照習戒光明無所不照忍辱
精進一心智慧悉習其光明無所不照作是
者可至無極慧燄明菩薩言以功德慧心爲
眼清淨所視色無有惡聲香味細滑法亦復
如是以淨於六事何謂六眼耳鼻舌身意諸

所可者不那中作樂用心淨故所視人欲令
悉入佛法其不正者以法率化所有好物人
來索之無所愛惜既與不從後悔作是者可
至無極慧可意王菩薩言其有罵詈搯捶者
亦不瞋恚但念其法以何念法何所罵者何
所瞋者其搯捶亦爾以內空無所得於外空
無所疑身於身無所見亦不見於他人所以
者何其索手腳者歡喜與之其欲取頭者其
心倍悅若索城及珍寶其有索者無所貪惜
其求妻子即持施與無有異心若諷誦起是
經得一章歡喜不樂爲金輪王歡樂爲一切
人說法而不作釋願樂遣一人發心爲菩薩
不作梵天願樂見佛不貪三千大千刹土之
珍寶作是者常無懈怠如是歡喜可至無極
慧所視無底菩薩言視一切諸所有不念是

我所悉清淨刹土不念有與無見諸佛不想色求所以者何用法身故視一切人心不求一切人之所有所以者何其德眼逮得清淨便有道眼神足備具以得慧眼便知所有無所可貪便得佛眼十八法悉具以得法眼者具足十種力其作如僧那僧涅者便至無極慧作無底行菩薩言一切所作如薩芸若所作何以故無所住故以無所住但念諸法菩薩作是者不以諸順何爲隨亦不以罪隨亦不以魔事隨所以者何不捨法故不犯非法以故致是以度罪所作魔事以應是者可至無極慧說息愛意菩薩言一切所有者亦不從人受以所作便喻嗒諸魔以自知者無所有亦無所復作以知無所復作便制五陰以知五陰者無有魔事以度魔界者所作中道

無所覆蔽已度無所覆蔽菩薩摩訶薩作是者可至無極慧所起即悔菩薩言諸所作非法意而悔之所作如法其心無異所以者何常當專心作善其身有所作不欲令人不可若口若意所作不欲令人有不可其有愁憂者以法寬大令不^{惟五}愁憂作是者是爲菩薩摩訶薩可至無極慧得一切願菩薩言其有如淨戒者所願必得以如淨戒者不復犯俗不犯俗者以應三十七品根株如薩芸若其以如淨戒者不犯三十七品是爲菩薩摩訶薩所作以至無極慧普等華天子言譬如樹有華其見莫不歡喜所作功德一切莫不蒙者譬若忉利天上拘耆樹而有華熾盛諸天莫不愛樂菩薩以法爲一切作眼譬若華若天上摩尼之寶而無瑕穢菩薩清淨其心如是

其作是者可至無極慧光明華天子言譬若如日出衆冥索盡所有諸色悉見菩薩以智慧無所不照其諸愚癡冥盡索爲開闢所以者何終不而當明故其在冥者見明便得道徑菩薩以住道徑者其忘失道徑者指示道路以如是者可至無極慧天香華天子言譬如曼陀羅華其香聞縱廣上下四維各四千里菩薩以所聞淨戒三昧持智慧以爲香三千大千無不聞者是香愈無央數人病其以所聞淨戒三昧智慧菩薩以住是者便至無極慧信法行得天子言當作法當所作者以如菩薩法者常不復懈怠無所復懈無復念便當得十事習六波羅蜜以四等心五旬四事總三脫忍辱利令人發意其身不離以漚和拘舍羅教悉持諸法要所信無有異是爲

十事其作是者可至無極慧文殊師利謂諸上人及諸天子菩薩住無所住何謂住無所住於三界不以三界作習不習者是爲內亦不求習者是爲外雖外不情弟子無所習復不情辟支佛地習謂生死所學習謂無所知惟王習者是爲名所學習是爲色習者是因緣所學習謂有所見習者謂愛所學習謂有所根習者謂有所學習謂非我習者貪所學習所施與無有異習者謂犯戒所學習不於戒自貢高習者謂瞋怒所學習忍辱而不貢高習者無精進所學習精進而不自貢高習者謂亂意所學習爲一心而不自貢高習者謂無知所學習智慧不貢高習者謂無功德所學習謂作功德而不貢高習者謂俗法所學習謂道法不自貢高習者謂無脫所學習謂

得脫而具足不貢高習者謂有罪所學習無有罪亦不貢高習者謂有餘所學習無有餘盡亦不貢高菩薩習無所習一切護亦不著亦不斷作是者便至無極慧諸法一切無所得所以者何無所入亦無所不入故是一切智便至一切智無所得者一切智得一切智不可以色計痛癢思想生死識亦爾不從法數亦不從非法數亦不一切智施與爲數所以者何施與者亦不離一切智戒忍辱精進一心智慧亦不爲數何以故一切智從智慧惟五一切智者無所不入亦不過去當來亦不入現在所以者何以過三世故一切智者不以眼而視之耳鼻舌身意亦爾所以者何以過諸界故若男子女人欲求一切智者當如一九切智住當云何住於諸法一切無所住是爲

一切智住不自念法是我所作是者爲一切智一切人法佛法等如是無有異是爲一切智其求欲得一切智者會從四大得所以者何爲身不作身計所以者何不以作因緣故其有功德法無有功德法其所有是爲我所者皆非我所我者無所生無所生者無有計其計者是爲不生其示若見者是皆無有生以知無生無所生慧作是等者是爲薩芸若文殊師利說是事時二千天子悉得無所從生法忍萬二千人悉發無上平等道意樂不動菩薩謂文殊師利共到佛所問菩薩當云何住應時文殊師利化作如來在衆會中而坐其形狀被服如釋迦文佛文殊師利謂波祇槃拘利菩薩言屬之所問今佛在是可問菩薩住波祇槃拘利菩薩不知是爲化佛前

長跪問怛薩阿竭菩薩當云何有所住化佛
言如我所作菩薩當如是住復問云何如佛
其佛言亦不從施與亦不從戒忍辱精進一
心智慧亦不從欲亦不從色亦不從無色亦
不從身行亦不從口行亦不從意行諸所行
無所著故其佛問波坻槃拘利化者而有所
從行不則答言無所從行其佛言如化無所
從行菩薩當作是行波坻槃拘利菩薩復問
文殊師利是佛當無化佛乎文殊師利答言
若自知諸法如化不則答言諸法實如化文
殊師利言以知諸法化何爲復問如來化文
殊師利言仁者謂以諸佛悉化則復問文殊
師利其佛者從何所化文殊師利言所作本
清淨以故而有化文殊師利言故佛無有吾
無有我無有人無有壽無有命亦不依佛住

亦不依凡人住波坻槃拘利菩薩復問化佛
本何所學自致得佛其佛言無所學是菩薩
學何以故亦不自念我欲求是亦不求是亦
不憂亦不喜亦不緣亦不所化亦無所見亦
無處所亦無有想亦無有字亦無有色一切
無所希望是菩薩學作是學者以爲等學作
是學者無所著無所縛作是學者無有欲無
有怒無有癡作是學者無所愛無所憎其學
是者不自念我作是學是爲學作是學作是
學者不墮惡道其佛言若有求阿耨多羅三
藐三菩提心欲成至佛者當作如我學復問
何所是佛學其佛言亦不作罪亦不墮罪亦
無所與亦無所持亦無所不持亦不持戒亦
無有戒亦不忍辱亦不惡意亦不精進亦無
懈怠亦不禪亦不亂意亦不智慧亦無所知

亦無所學亦無有所學亦無所成亦無有所成亦不菩薩亦不佛法亦不自念有身亦不念他人有身其所見者無有想亦不法想亦不無法想不想無想其佛言曉了是者菩薩當作是學所以者何諸法一切如幻是爲相諸法一切皆合所以者何雖無央數事念之皆空無所有合則爲空諸法不可見所以者何諸法等而無差特諸法悉默所以者何不語不言是故無有處所以故諸法無所生其信是者亦不念行亦不念得脫亦不菩薩自貢高其佛言若聞是學者不恐不怖不畏是故名爲菩薩譬若空不畏火不畏風不畏雨不畏煙不畏雲亦不畏雷亦不畏電所以者何是空法故菩薩者當如是一切無所畏懼菩薩心以如空者乃伏衆魔便能爲佛能

爲一切作護其化佛說是語竟便不復現波
抵槃拘利菩薩問文殊師利今怛薩阿竭所
湊則答言所從來處而所湊所湊處從是來
波抵槃拘利謂文殊師利其化者無所從來
無所從去何謂從來文殊師利答言譬若如
化來無道徑去無道徑諸法亦爾無所從來
無所從去波抵槃拘利復問何所是諸法之
處則答言自然住是之處復問一切何所處
是其處如所作是其處復問諸法無所作無
有罪文殊師利言如是者諸法無所作無有
罪其法者亦無有作者無有作者諸所有
悉入法身則復問文殊師利無有作無有罪
何以言人隨其所作文殊師利言審如所問
人亦無所作亦無有罪所以者何是人之法
法身故亦無有作亦無有罪如所作如所得

惟五

十二

是三者等波坻槃拘利菩薩復問是三事等
乎文殊師利言怛薩阿竭等故三事適等復
問怛薩阿竭者無作無罪無得是三事何緣
與等文殊師利言怛薩阿竭無作無罪無得
其作其罪其得如所爲以故等其罪以過了
不見罪已過當來亦不離怛薩阿竭故說是
時如在釋迦文佛所尊者舍利弗阿難及諸
尊比丘悉承佛威神皆聞文殊師利所說舍
利弗言善哉善哉上人之所作以法無所不
感動不離法身其有智者聞是莫不發意佛
言審如所語菩薩者學無所學所語平等無
有異如所種得其實其菩薩者所學慧如是
所說如慧佛語舍利弗汝若所學自致是慧
頂中光明菩薩白佛何所聲聞所學何所菩
薩所學佛言有限有著故爲弟子學無有限

無有礙是爲菩薩學如聲聞者其學小其智
少菩薩者學廣大其所知無有極所說無所
罣礙光智菩薩白佛唯怛薩阿竭作感應令
文殊師利衆會悉來到是所以者何其在是
會皆令得無所亡失所以者何文殊師利所
說甚深微妙其欲聞者隨其所欲各令得所
佛即感動文殊師利應時與二十五上人及
諸天子俱到佛所前作禮而住光智菩薩問
文殊師利佛在是間而若何緣得在異處而
說法文殊師利言所以不在是間者佛甚尊
不可當或所語可怛薩阿竭意或不可意故
在一面其菩薩復問說何所法而可怛薩阿
竭者文殊師利答言佛自知之復言雖爾會
說其意文殊師利則言如我所知少當說則
言何言是文殊師利言如所說所說法而不

異如怛薩阿竭如本際而不可議如法住如法說爲怛薩阿竭意無所止無所斷亦不緣亦不所緣亦無所增亦無所減作是說而不失怛薩阿竭意亦於身無所失亦不令他人有所失亦不亡法亦不亡生死亦不亡泥洹作是說者亦不失怛薩阿竭意佛言善哉善哉如文殊師利所說以可怛薩阿竭意所以者何亦不過亦不減適在中無所想所以者何文殊師利續三昧說事如故不見諸法有所增者有所減者如文殊師利所語不失怛薩阿竭意說是語時八百天子皆得無所從生法忍爾時衆會中復有二百天子皆前以發菩薩意而未堅固皆欲墮落各各有念佛法無有極難得至佛我等不在菩薩學中不如取羅漢辟支佛而般泥洹佛悉知是人可

成爲菩薩而中欲意轉佛便化作一迦羅越持百味食滿鉢齋到佛所前而作禮以鉢上佛唯加哀受之佛即受鉢文殊師利便從座起叉手白佛雖食當念故恩舍利弗心念佛本作何等而文殊師利言當念故恩乎即問佛文殊師利本有何功德而置怛薩阿竭佛言且忍今爲汝決狐疑即以鉢捨地其鉢便下沒過諸佛利直下過七十二恒邊沙等刹土刹土名曰漚呵沙其佛號荼毗羅耶今現在其鉢在彼佛利住止空中亦無持者鉢所過諸佛利其佛侍者皆問佛是鉢從何所來諸佛言上方有利名曰沙呵佛號字釋迦文鉢從彼來所以者何救護墮落菩薩意故以變化感動佛語舍利弗行求鉢來舍利弗即承佛威神自以慧力入萬三昧過萬佛刹亦

不見亦不得從三昧還白佛求之不見不得
佛言且捨佛復謂大目捷連行求索鉢則承
佛威神自蒙神足力入八千三昧過八千佛
利無所見無所得則從三昧還白佛求之不
見不能得佛語須菩提行求鉢來則入萬二

千三昧過萬二千佛利亦不見亦不得即從
三昧還白佛求之不見不能得則五百尊比
丘各各以神足行求索鉢亦不能見亦不能
得須菩提從座起白彌勒菩薩仁者高才一
生補處現當來佛吾等行求鉢不能得唯行

惟五

十五

求之彌勒則答言如若所說實一生補處今
者不及文殊師利所作三昧及其名字聽我
所言我作佛時如恒邊沙等悉為文殊師利
復不能知我行步舉足下足之事如今者實
不逮及不如報文殊師利而行求之則須菩

提白佛唯恒薩阿竭當令文殊師利而行求
鉢佛即謂文殊師利行求鉢來文殊師利即
默聲以受教即自思念而不起座不離佛不
捨眾會於是便能致鉢即時三昧為無所不
徧入即於眾會以手指地其手而下行所過
佛刹悉為諸佛接其足下方莫不聞其聲道
釋迦文佛致問其臂者一一毛放億百千光
明一一明者有億百千蓮華一一蓮華上者
皆有菩薩其菩薩者皆各各歎釋迦文佛是
所過刹土皆為六反震動其刹土皆嚴莊幢
幡而起所過處悉皆見文殊師利以右手悉
接諸佛足皆言釋迦文佛之所致問過七十
二恒邊沙等刹到明開闢刹土乃至荼毗羅
耶佛所前作禮為釋迦文佛致問其臂上毛
一一毛有億百千光明億百千蓮華一一蓮

華上有坐菩薩悉歎釋迦文佛功德其菩薩
光明彼佛光明而不相錯各各自見光明王
佛邊有侍者而尊菩薩名曰光尊自問其佛
是誰手臂姝好乃爾其毛光明蓮華菩薩之
所歌歎彼佛功德其佛言上方過七十二恒
邊沙等刹土名曰沙呵其佛號字釋迦文佛
今現在前有菩薩名文殊師利不可思議僧
涅其智無所不度以續在彼佛前坐用鉢故
而投手乃到是間其菩薩悉作是念皆白其
佛譬如渴人欲得飲願欲得見釋迦文佛文
殊師利及其刹土其佛即以兩眉中央相而
放光明徹照過七十二恒邊沙刹乃至沙呵
刹悉爲開闢其有人見其光明者皆得安隱
其身譬如遮迦越羅其有凡比丘者得須陀
洹其過三道上者皆有八惟務禪應時得羅

推五

十六

漢其菩薩身得是光明者皆逮得日明三昧
茶毗羅耶佛刹諸菩薩從彼間悉見是間及
諸聲聞諸菩薩以見是間刹土則是淚出便
言若瑠璃清淨及其摩尼墮其汙泥誠可惜
之所以者何沙呵刹土諸菩薩誠可惜之而
生彼間茶毗羅耶佛謂波霸頭菩薩汝不曉
是勿得說之所以者何我刹土十劫行禪不
如彼佛刹人行慈從日出至食其所功德過
倍是間彼之菩薩雖有宿命行法如彈指頃
者其罪盡索是間菩薩悉問佛是光明從何
所來今身皆安隱佛則言下方過七十二恒
邊沙等佛刹土名漚呵沙何佛者號字茶毗
羅耶放兩眉中央相光明菩薩悉白佛願聞
欲見漚呵沙刹土及怛薩阿竭茶毗羅耶應
時釋迦文放足下光明照下方過七十二恒

推五

十七

邊沙等剎漚呵沙剎土及茶毗羅耶佛盡爲開闢彼剎菩薩見其光明入其身悉得摩訶低三昧具足三昧是間菩薩盡見彼佛及剎譬如在地住者莫不見日月星宿下方見是間亦如是間下方茶毗羅耶漚呵沙剎土文殊師利以右手取其鉢與無數拘利那術百千菩薩俱而來上所過諸剎土其蓮華一毛光明稍稍而盡其鉢便手中是間文殊師利則從座起爲佛作禮以鉢授佛佛則受之其菩薩從下上者悉作禮各各自以佛名謝釋迦文佛怛薩阿竭即時各令就座悉皆受教各各而坐佛謂舍利弗屬之所問用文殊師利所問故今爲汝說之已過去無央數不可計阿僧祇劫爾時有佛號字勇莫能勝其剎名無常爾時諸聲聞八萬四千人菩

薩萬二千人俱悉會其佛爲三道家而說法佛言時怛薩阿竭勇莫能勝於五惡世而作佛有比丘比丘名慧王明於經法持鉢入惟致國中而行分衛得百味飯若干種食爾時有尊者子名離垢王爲乳母所抱持在城門外而住其兒遙見明經比丘欲從抱下得下便趣之求其食比丘即以蜜餅授與之其兒則食之知味甘美隨比丘而行不顧念乳母便隨至勇莫能勝佛所則爲佛作禮而坐一面若那羅耶比丘以所持鉢得食而與是兒令上其佛兒則受之以上怛薩阿竭其佛受食鉢則爲滿其兒所持鉢食續如故復以是食徧八萬四千比丘及菩薩萬二千人各各悉飽滿其兒所持食續復如故佛以威神令兒歡喜并蒙本之功德即爲盡信便前而住

即歎其佛所持鉢食而奉上以應時滿其所持者亦不缺減徧比丘及諸菩薩其食續在乃知佛尊亦不盡索而復增益其供養佛者功德可重而增佛語舍利弗是兒以一鉢食乃至七日其食不減滿則如故其佛阿波羅耆陀陀教導其兒自歸佛及法比丘僧授與五戒教令悔過勸助功德乃發阿耨多羅三藐三菩提心其兒父母求索子無所不徧乃至怛薩阿竭所前爲佛作禮而住其子見父母前爲作禮而譽言我今人菩薩法用一切故願復發意所以者何難值佛故語其父母視佛相及其種好其慧無所不徧其道以度願欲我身令得作沙門所以者何難與怛薩阿竭會故父母即言善哉善哉隨子之所欲歡樂子之所求悉如子之願吾等亦復發心

當從汝爲法則今悉放其舍宅亦復效汝而爲沙門佛語舍利弗是兒之所言父母及五百人悉發阿耨多羅三藐三菩提心悉於阿波羅耆陀陀佛所皆作沙門佛語舍利弗汝之所疑者即若那羅耶比丘者文殊師利是其時兒尊者子恆五惟摩羅和耶者十九是我身文殊師利以食與我作其功德而令發心是則本之初發阿耨多羅三耶三菩提心因佛語舍利弗汝欲知其今佛十種力四事無所畏其智慧不可議悉文殊師利之所發動所以者何心則是根本佛復語舍利弗如我身等不可數阿僧祇剎土諸佛悉爲文殊師利之所發動號悉字釋迦文佛如是佛數復有號爲提式佛復有號式佛復有號提和竭佛復有號惟衛佛佛語舍利弗悉說是諸佛字從劫

至劫未有竟時皆悉文殊師利之所發動今現在悉轉法輪中有般泥洹者中有行菩薩道者中有在兜術天上者中有在母腹中者中有生者中有捨家求佛者中有坐佛樹下者中有成佛者猶不可盡佛謂舍利弗文殊師利者是菩薩之父母是則爲迦羅蜜屬所問者何緣而置怛薩阿竭而我之所得悉蒙文殊師利恩以爲是恩故其二百天子即時自念諸法學者乃可有所成吾等尚可所以者何今是釋迦文佛爲文殊師利所發意自致成佛我等何爲懈怠用是念故其心則堅悉得盡信阿耨多羅三耶三菩心文殊師利以手變化而得鉢無所不感動是謂本之學習從是刹土乃到下方過不可數人皆悉發阿耨多羅三耶三菩心十方今現在諸佛皆

以珍寶華蓋用供養法故悉覆三千大千之刹土從其華蓋盡聞其音如釋迦文佛之所言皆文殊師利之所感動佛語舍利弗若男子女人欲疾般泥洹者當發阿耨多羅三耶三菩心所以者何有人畏生死而不能發心爲阿耨多羅三耶三菩心欲求聲聞作阿羅漢早取般泥洹其作是言者我續見在於生死中有菩薩而精進者已成至佛所以者何以過去無央數不可計阿僧祇劫爾時有佛號字一切度壽一萬歲有百億弟子有尊比丘名莫能勝其智慧甚巍巍後有尊比丘名得大願其神足亦甚巍巍爾時怛薩阿竭整衣服持鉢與比丘俱入常名聞國分衛其尊比丘智慧備足者在佛之右其神足比丘在佛之左有尊比丘名悔智隨佛後而侍之八

千菩薩而在前導中有如釋者中有如天子
被服者中有如天者中有如四王者皆悉
令人治道用怛薩阿竭故佛語舍利弗時佛
以入城道徑而過於市有三尊者子各各尚
小莊嚴被服甚姝好而共坐戲是一兒遙見
佛且未及諸比丘菩薩光明甚巍巍其小兒
謂二兒以手遙指示之乃見怛薩阿竭來光
明與相隨者不甚好乃爾其二兒則言已見
之是一兒便言此者一切之中極尊而無與
等者吾等當共供養所以者何其福無量其
二兒則答言亦無華香當何以供之其一兒
則脫著身白珠著手中便報謂二兒是猶可
以供佛智者見怛薩阿竭不當作貪財其二
兒效解取著頭上白珠著其手中即各歎言
行至佛所譬若渡水所以者何以其心淨而

等住故是一兒復問二兒持是功德以何求
索其一兒言願如佛右面尊比丘其一兒言
願如左面神足比丘是二兒各各有是願已
復共問一兒若願何等即報言我欲如佛其
光明無比如師子獨步常有衆而隨我是兒
作是說時虛空中八千天子皆言善哉善哉
如若之所言天上天下一切蒙若恩是三兒
相將來至佛前其怛薩阿竭呼侍者沙竭汝
乃見是三兒而持白珠來者不其中央行小
兒悅心精進來行舉其一足時却其罪百劫
如下一足後事事當更百遮迦越羅如是數
當復更釋亦如是其梵天亦等如是其一舉
足之功德中百見佛語適竟是三兒已到前
爲怛薩阿竭作禮各各以其白珠散佛上其
二兒發聲聞意者所散珠各在佛上肩昇其

一兒發阿耨多羅三耶三菩心者而散白珠在佛頭上而在虛空化爲珠華交露之帳正等而四方中有牀怛薩阿竭而坐之其佛則時笑沙竭勃問佛怛薩阿竭所笑會當有意願聞其說佛言見二兒發聲聞意者不所以者何皆畏生死之懼故是以不發菩薩心所以者何欲疾般泥洹故其侍者問其一兒當云何佛復謂言是中央兒以後自致成佛是二兒乃爲作聲聞其一者智慧甚當尊一者神足亦復爾釋迦文佛問舍利弗汝乃知是中央兒不舍利弗言不及佛言則我身是乃知右面之兒不舍利弗言不及爾時右面之兒則舍利弗是其左面之兒則摩訶目捷連是佛謂舍利弗汝等本畏生死故不發菩薩心而欲疾般泥洹觀其一兒發阿耨多羅三

惟五

三三

耶三菩心者今我自致成佛如汝等不離吾法而作聲聞乃得解脫佛復謂舍利弗其欲疾般泥洹者當發意求佛如我屬之所說其疾者無過薩芸若所以者何無所罣礙故用特尊故用無盡故用阿耨多羅三耶三菩心故莫能有及等故特有好故以過諸聲聞辟支佛故其欲作者便得薩芸若意亦復如是說摩訶衍品時萬人悉發阿耨多羅三耶三菩心其一尊比丘舍利弗摩訶目捷連阿難舍比摩訶迦葉螺越難頭耶和致離分陀頭陀須菩提等悉以頭面著佛足皆舉言若男子女人欲求道者當發尊意所以者何如佛百千法以爲吾等說不能復發作菩薩心皆而有悔爲羅漢故不如本作五逆惡其罪猶有解脫可發心爲阿耨多羅三耶三菩心

惟五

三三

今者以無所益所以者何違離佛種故其器者以不堪菩薩心所以者何譬若死人無益於生者今吾等以得脫無益於天上天下有兩足若四足者皆依地而得活其有發心爲阿耨多羅三耶三菩心者諸天及人皆蒙其恩爾時阿闍世王乘駟馬車與羣臣俱出而到佛所前爲作禮而住白佛言一切人從何因緣而作罪佛語阿闍世以住吾我人者便作罪貪身故而有身用是故不離其中阿闍世王復問助貪愛者根爲在何所佛言無點是則復問誰是無點根佛言所作與念異是故根復問何所與念異者佛言其本異所作謂是復問本異者何謂是佛言如幻所化無所有是故異復問誰化者佛言無有造者是故化復問無所生無所有當云何計佛言用

無有生無所有故不可計復問所疑從何因緣起佛言無所據故何謂無所據佛言如所說聞之則疑是謂不據復問何所是道何所爲信佛言脫於婬怒癡是爲道何所是信佛言不得諸法根本其心不異是故爲信阿闍世王即言善哉善哉如怛薩阿竭所說一切人所以不信者何自作故今我用惡人之言勅令臣下自殺其父用貪利國故用貪財寶故用貪利宰民故用貪利尊貴故今我使臣下而害其父貪身狐疑不能自解若飲若食在戲樂若在正殿聽省國事若在中宮五欲之樂若獨與衆俱晝夜而不忘飲食則不能消亦無其卧顏色亦無和悅時其心常怖慄知不離於泥犁則復陳言若盲者承佛所得眼目若爲水所溺者依佛而得脫其有苦痛

惟五

三十四

者佛而令得安其有恐懾者佛而爲作護其有貧窮者佛能爲作珍寶其有失道徑者能示於道路佛以加大哀不以爲勤劇等心於一切堅固而作厚常忍於苦樂不捨於一切人今我身如怖懾唯佛當加護令危者而得安身無有能救者唯願而得濟無所歸者唯願受其歸今譬若無眼目唯得而視瞻如人之欲躡唯令而得住今當入阿鼻乃至大泥犁願令得不入唯怛薩阿竭今當爲我解說吾之狐疑令心而得開至死無餘疑令重罪而得微輕佛念阿闍世王其所說甚深而微妙是病莫能療之者獨佛文殊師利而有感應舍利弗承佛威神謂阿闍世欲決狐疑者明旦作食請文殊師利等令到其宮受之者其若之官屬皆當得其福并羅閱國諸民皆

因是功德可而爲本阿闍世王則白文殊師利唯加大恩明旦屈德就宮而食則文殊師利答言以足可爲供養已文殊師利復言佛法非以衣食故阿闍世即白當何以施之則答言若深入微妙其事審諦無所汙亦無所著亦無所疑無所難無所畏無所一懼如是者以爲得哀文殊師利復語阿闍世念諸法亦不念有亦不念無是者以爲得哀不當念過去意亦不當念當來意亦不當念現在意作是者以得加哀汝不當念一切之所可見者亦不誠作是者以得加哀阿闍世王復白文殊師利如所言悉法之所載無有異唯以身故當加哀受其請文殊師利復言且止其道者非以是故若飲若食若王不念有吾有我壽命人以念是者以得加哀若心無所持

亦無所緣亦不四大亦不五陰亦不六衰亦
不持三界亦不於功德亦不念無有功德亦
不於俗亦不於道亦不於罪亦不於無罪亦
不於餘亦不於無餘亦不於脫亦不於無脫
亦不於生死亦不於泥洹作如是者以得加
哀阿闍世王復白文殊師利聞是法倍復踊
躍以是故欲請之令我緣是而得安隱文殊
師利答言汝希望有所緣欲得安隱是以不
緣則無安隱所以者何因其法無所緣無有
安不念是亦不貢高一切無所念是故緣是
故安於是中無惡意後復無災變者後有災
變者是則不安從本至竟無有異是乃爲安
阿闍世復問說何所法而無異可得安文殊
師利言若空無作者無有能作者無有相無
有願無有作亦無有作者其有念我有所作

無所作是故爲異亦不求無所緣身口意是
爲作所以者何無生死相是故諸法若有所
緣當知悉無所緣阿闍世復問何謂生死無
生死則言不念過去已盡亦不念當來未至
亦不念今現在而無常於諸法不念有所增
有所減作者^{惟五}是生死則無生死阿闍世復問
未脫者當云何與道合文殊師利言汝知日
明與冥合不阿闍世言不合所以者何日出
衆冥悉闕文殊師利復問寧知冥在何所處
則答言不可見處而在何所處文殊師利言
所謂道智來時譬若日出不可知衆冥所在
如是時亦不知未脫所在文殊師利復言道
與未脫等未脫與道等何以故俱空故未脫
與道等故諸法平等其知是者未脫則爲作
道何以故求不脫不知處是故曰道其求不

脫處而不可見是則道阿闍世復問云何不脫而爲道文殊師利言於不脫而爲道文殊師利言於不脫是爲道不作是者爲道阿闍世復問其道者當云何學則答言如學諸法阿闍世復問以學諸法寧有處所不文殊師利言作是學道不可至阿闍世復問其學者當至泥洹不文殊師利言乃有法從泥洹來言我從泥洹來阿闍世即言亦無往者亦無來者文殊師利謂阿闍世其學道知無處所是故道阿闍世復問當何所住道而學作是則答言無所住是爲學道阿闍世復問其學道者不作淨戒三昧智慧住即答言其道者不緣戒不求三昧不貢高於智慧住文殊師利謂阿闍世乃可緣戒求三昧貢高於智慧作如是則有住處不阿闍世言無文殊師利

言故當知道無所住阿闍世復問若男子女人當云何自前於道文殊師利言其欲學道者不見法有常無常不見法有脫無有脫亦不見法安若苦者亦不見法是我若一切人亦不見法在生死至泥洹者作是學道者爲以前阿闍世王即言善哉善哉如文殊師利菩薩之所言唯願受其請所以者何用狐疑故熟自思念如諸法無吾無我無壽無命而我有狐疑文殊師利言如無者不可令有以無者亦不脫亦不無所脫其說我而有脫者以無有脫者亦不脫亦無所脫所以者何諸法悉脫故佛謂文殊師利受阿闍世王請用無央數人故文殊師利則言唯受恒薩阿竭教所以者何不違教故阿闍世則踊躍歡喜便從座起爲佛諸比丘及文殊師利作禮而

延統
坐褥也

佛說阿闍世王經卷下

惟六

後漢月支三藏法師支婁迦讖譯

應時二萬二千菩薩同共發聲我等欲與文殊師利俱行即時如其數菩薩與文殊師利俱悅忽以在沙呵刹土其處而坐其處者謂

惟六

室中所以能容者是菩薩威神故悉共坐已文殊師利說其法其法名曰陀隣尼文殊師利謂諸菩薩乃知何所法名陀隣尼者而言解一切諸法故其意無所望故所作無有異所念應時足所知如智慧其法者悉知其本所語如諦自護不墮用轉上故悉入諸法行陀隣尼者則道之元不斷佛元持法之元總持僧之元於諸法無有殆在人之所問即能知報答見衆而不却所以者何無所畏故欲教化諸天隨天之所欲而悉教之令各各得

解及龍闍叉阿須倫迦留羅真陀羅摩休勒人非人及釋梵下至一切諸蟲獸鳥獸各各知其意隨其所欲而悉教化令得其所悉曉了有功德無功德者盡知一切人之行住其心譬如地於世不以八事中有順何所作功德不離於道教照於人隨其所樂令一切皆蒙其恩所作戒令一切悉在中其慧無所不徧入爲一切之所重而不以爲勤苦其心無有異其法者知而本所教化承其教常以法而施與不以爲厭所說法不望當得其復不斷菩薩善根本所以者何以精進而養成其根故所施與不以爲厭是用薩芸若故以戒不以爲厭足所以者何恭敬一切人故忍辱不以爲厭足便逮得佛身故以精進不以爲厭足合會諸功德故以禪不以爲厭足無所

希望故以慧無厭足所以者何無所不念故以法爲俸祿而自依爲得活一切無所豫其如是者是故爲陀隣尼陀隣尼者悉總持諸法故云何持空無相無願無欲無所著無所見故以是持無所生無所造爲作是持法亦

惟六

二

不來亦不去亦不住亦不亂亦不起亦不壞亦無所持亦無所掌於脫不想脫亦無所住亦不當住亦無吾亦無我亦無壽亦無人亦無所執亦無放亦不誠亦不虛亦無所聞亦無所見亦如虛空無所稱譽亦無所觸亦無所覺持一切諸法故曰陀隣尼復有陀隣尼者持諸法如幻譬若如夢若野馬譬若水中聚沫如水泡譬若化悉持諸法故曰陀隣尼復有陀隣尼以無常持諸法若所見無我而寂諸法根本悉脫其中於法無所爭亦不墮

亦無期以是持一切諸法故曰陀隣尼譬若如地無所不持不以爲勤劇菩薩以逮得陀隣尼者爲一切作本阿僧祇劫諸所作功德悉能合會發薩芸若心無所不持亦不放亦不以爲煩苛所以者何若地爲一切之所載

仰菩薩以逮得陀隣尼者饒益於一切若樹木萬物因地而生菩薩以逮得陀隣尼者悉生諸功德法譬若如地亦不動亦不搖亦無所適亦無所憎譬若如地受一切雨亦無厭極菩薩以逮得陀隣尼者一切諸佛菩薩聲

惟六

三

聞辟支佛所問法亦無厭足爲一切說法亦無厭極譬若如地含裹諸種皆得時出菩薩以逮得陀隣尼者悉含裹諸功德法種亦不失時輒如時具足諸法乃坐佛樹不離薩芸若菩薩已得陀隣尼者勇猛如將兵中之率

無所不伏菩薩以逮得陀隣尼者坐於佛樹
降伏衆魔故曰陀隣尼復有陀隣尼於諸法
無所持何以故於有常無常故亦無樂亦無
苦有身無有身無有人無有常一切諸法無
所持所以者何無有二心故譬若如地不持
空陀隣尼一切諸法無所持譬若空不持有
所有陀隣尼者於諸法亦無所持譬若水不
持諸垢濁陀隣尼者於諸法亦無所持譬若
有所至無處所故陀隣尼無所持故陀隣尼
者不可盡無有盡不可度故無所不入無所
不入故是爲空界陀隣尼與空等說陀隣尼
時五百菩薩悉得陀隣尼法文殊師利於二
夜說菩薩藏諸法莫不從是若功德法若無
功德法若俗若道若有罪若無罪若有餘若
無餘若脫若不說一切盡入是藏何以故用

諸法故無所不得故譬若三千大千刹土含
受百億國土百億日月百億須彌山百億大
海盡入三千大千亦不凡法亦不道法盡入
其中聲聞辟支佛法若菩薩法盡入其中何
以故悉總持諸行故持聲聞持辟支佛持菩
薩若如樹其根堅住者本莖枝葉華實皆而
成好菩薩藏者無所不持無所不成一切持
諸功德法悉持薩芸若心其菩薩藏者若器
名曰受不可數譬若海含受衆水受於珍寶
龍閱又捷陀羅眞陀羅摩休勒無不包裹爲
一切作其處其藏者因緣不可數亦如是受
無數戒其聞三昧智慧所見其器無所不受
而見故曰菩薩藏譬若如海其往生者不飲
餘水所以者何皆因海故其在是藏者皆因
是法不在外道所以者何盡受薩芸若法味

故故曰爲菩薩藏是者爲三藏何謂三藏聲聞藏辟支佛藏菩薩藏聲聞藏者從他人聞故所以者何聞其音故辟支佛藏者緣十二因緣故以因緣盡而致是菩薩藏者入無央數法而自然逮成佛其聲聞若辟支佛其三藏者非聲聞辟支佛所有也說是法時其三藏者各得如所行所以者何說是時其聲聞辟支佛菩薩各得其行故曰三藏其逮得菩薩法者便有三藏所以者何聲聞辟支佛不離佛法故復有三藏學何謂三藏有聲聞學有辟支佛學有菩薩學聲聞學者用有度故但自明故辟支佛學者是謂中學無有大哀菩薩法不可度入法身故用大哀故聲聞者不學辟支佛事亦不了辟支佛事辟支佛不學菩薩事亦不了菩薩事菩薩者知聲聞所

惟六

五

學不以爲樂不於是中有所希望亦不於是中而求脫亦知辟支佛所學不以爲樂不於是中而求脫而知菩薩所學樂於所學而自歡樂當因於中得脫故教聲聞而示現以其行教化之其辟支佛亦爾是菩薩作故名曰菩薩藏譬若以器受其瑠璃用瑠璃故其器亦作瑠璃之色菩薩以逮入藏者以諸法所見不離佛菩薩以逮藏者諸所見法悉見於佛法菩薩悉無所不學諸法所以者何無有異所見諸法悉如佛證其菩薩藏者無央數字而教不可度處所以者何無增減故不可議光明悉照於冥所作者有惠利無有極入薩芸若無所不入其學是學乃爲學悉入藏故便入摩訶若那摩訶若那者無極慧以入者其未入者而入之爾時文殊師利爲諸菩

薩說其藏事已復於三處說阿惟越致輪金剛行說是時其聞者悉逮得是事其輪者亦無所轉阿惟越致輪者無所希望於一切其心無有異所以者何不念善惡以等心學法見諸佛刹亦復等視不著其好醜以諸佛等無有異其輪者無所不徧入所以者何不壞法身故以是故爲阿惟越致法輪其輪者無斷絕處所以者何無二心故其輪者如所見何以故以法輪致佛故是名曰阿惟越致法輪其從阿惟越致輪者悉以脫諸想故其信是者悉當得如佛不以二事故從一事脫所脫如怛薩阿竭所因脫其脫者無想是故諸法其有想無有脫何以故其脫無有二所以者何無身口意故所以者何其脫者亦不從身口意故曰脫作是者以爲自從不從他人

惟六

六

故曰阿惟越致輪其輪者不轉色所以者何其色自然故痛癢思想生死識亦不轉所以者何識自然故一切法亦不轉所以者何法身無法轉故是曰阿惟越致輪其輪者所入無有際何以故無有斷絕故其輪亦無所著亦無有斷何以故其輪無有門故所以者何不二心故其諦亦無轉者所以者何不可說故其輪亦無有能解者所以者何亦不有其音何得見其形故其諦以空可致其脫者莫能有逮譬若如空無所不入何以故無所不入用脫於本故其輪者亦能行亦能步何謂行何謂步如金剛鑽穿衆寶云何可以鑽穿其法譬若以空鑽穿一切所以故是名曰法爲無所想是故金剛所以者何鑽穿一切諸所求故無願者若鑽金剛穿諸所未脫令而

得脫法身者若金剛諸所亂者而空理之怛
薩阿竭者如金剛悉穿無所有其脫如金剛
過於諸不脫者泥洹者見諸自然法文殊師
利爲諸菩薩說是阿惟越致法輪時菩薩悉
得羅毗拘速三昧得是三昧已其菩薩身一

惟六

七

毛者放億百千光明其一光明者見坐億百
千佛一一佛者到他方其求佛道而往教化
明日旦阿闍世王遣使者到文殊師利所唯
哀用時與等人自屈摩訶迦葉時與五百比
丘俱欲入城而分衛以行道半念尚早而旋
還與比丘俱過候文殊師利已到所皆住於
門外文殊師利問摩訶迦葉今早欲到何所
則言欲行分衛故文殊師利復謂摩訶迦葉
我今與汝分衛摩訶迦葉則言已具足爲供
已所以者何以法到是不以食故文殊師利

謂摩訶迦葉與諸比丘俱就是當用法故亦
當用食故所以者何今亦不失其法亦令不
失其食故合兩以作一摩訶迦葉則答言吾
等常當忍不食當聽其法何以故一一諸深
法常從是聞摩訶迦葉則復問今日與諸摩
訶薩俱而食文殊師利言今所食處其人亦
不離生死亦不入泥洹亦不過欲事亦不以
道證所食處其食亦無所增無所減亦於諸
法無所持亦無所捨摩訶迦葉言其作是施
與者是爲無極施與則言諾受所請文殊師
利則自念今當入城所作當如佛之感動作
是念時便得無所不感動三昧則時沙呵刹
土平等如鏡諸丘墟山陵一切不現其光明
無所不接其在泥犁勤苦其痛則除悉得安
隱是刹諸人用是時悉無婬怒癡亦無妬心

亦無貢高亦無起意爾時諸人皆有慈心展轉相視若父若母應時地爲六反震動諸欲天子諸色天子以百種妓樂而供養文殊師利并雨天華而散其上從文殊師利所止乃到城門盡索嚴治以衆華結爲交露挾道兩邊以名殊華悉布其地以衆絕寶而爲帳幔惟六覆蓋其上其道廣六丈三尺兩邊悉有欄楯以衆寶華而作樹間間行列挾道兩邊則以寶作繩連縛諸樹展轉相連其一樹者香四面聞四十里兩樹間化有水池周布其邊悉有衆寶以爲擁障以瑠璃爲飾其水之沙者悉金其水有八味衆華悉生其中鳬鴈鴛鴦而走戲其間一一樹下當其根上而有衆寶之塚其塚上者皆以珍寶而爲香爐皆燒名香一一塚者其女百人各以蓮華擎持梅檀

名香文殊師利作是三昧時其威神無所不變化文殊師利從座起著衣服謂摩訶迦葉便而前行我今從後何以故其年尊老故復先佛法作沙門以是故當在前摩訶迦葉則時答言其法者亦無前後不計年歲而有尊幼文殊師利言當何謂爲尊老摩訶迦葉答言智慧是尊學問甚多是則爲尊在所作爲是則爲尊索知一切人之所行是則爲尊摩訶迦葉復言文殊師利亦有智慧學問具足在所作爲曉了一切人之所行以是當爲尊惟六摩訶迦葉復言今若其年亦復爲大亦復爲尊故當在前願樂在後今欲說譬喻唯願聽之若師子之子其膽勢氣力不如於大雖小蒙大者之香諸禽獸聞其臭者莫不恐怖譬若大象而有六牙其歲六十若人以革而爲

繩縛繫其象師子之子於革繩之所大象聞之鼻便奔走入山雖菩薩發意未成力勢非聲聞辟支佛之所而當衆魔莫不驚動縮腰而怖其師子之子見大者而嗚呼有所作爲其心不恐亦不畏據所以者何倍復歡喜今如是菩薩見佛有所作爲其心不恐亦不怖據所以者何倍復歡喜今我敢亦當如是舍利弗言欲計其尊者若聲聞若辟支佛其發菩薩心者是則爲尊所以者何其有所求皆從菩薩心而起摩訶迦葉言故文殊師利以是爲尊續當在前吾等承後文殊師利便在前諸菩薩在後聲聞悉從亦在後便向道天則雨華地爲六反震動諸天於上以妓樂而娛樂應時光明一切莫不明者便至羅閱祇未入城門王阿闍世聞文殊師利旦到從菩

薩二萬三千五百人其比丘者五百人俱王自念吾作五百人具今當云何供當坐何所應時天王名曰休息心與尊閱又名曰金剛鉞與俱而來與阿闍世王相見則言勿恐勿據勿以爲難則答曰當云何而不以爲難則報言文殊師利者作漚起拘舍羅無極智慧以功德光明具足而來神足功德其以一飯與文殊師利若有三千大千一切人索飯食者悉能飽之其食不盡索是二萬三千人何足可憂是故勿以爲難所以者何今皆可而悉足文殊師利者其功德甚尊而不可盡阿闍世應時而歡喜其心無異踊躍倍喜而設所作便將妓樂擎其華香而自出迎文殊師利等而俱入宮時於菩薩中有一菩薩名曰普視悉見則文殊師利勅三摩陀阿樓耆陀

令嚴治其處可容來者其菩薩受教應時四面而視瞻則時悉已辦於衆會中復有菩薩名曰法來則得勅令而具牀座應時受教彈指頃有二萬三千牀座其綰纒若干種色名殊好繡綺異色物悉布在上文殊師利及諸菩薩聲聞一切皆悉就座阿闍世前白文殊師利所作供具甚少願忍須臾今更欲辦其具則答言所作已可自足勿復勞意天王惟沙門與家室僕從悉來而謁皆恭事左右釋提桓因自與大夫人名曰首耶及與天女皆持名香供養散文殊師利及諸菩薩比丘僧上其諸菩薩亦不以天女亦不以妓樂亦不以華香有所轉動梵天而自化作年少婆羅門甚姝端正持扇住文殊師利之右侍而扇之諸梵天子悉復供侍諸菩薩比丘僧住於

十一

十一

之左持扇而事阿耨達龍王其在衆會虛空之上而無見者持把貫珠垂颺若幡從其貫珠其水流下水有八味若欲所當作悉取是水文殊師利及諸菩薩比丘僧人人前有垂珠水從中出悉給所當得阿闍世復念諸來會者而不持鉢今當以何器而食之文殊師利知王之所念則言菩薩者不齋鉢行而所食處念鉢便從其刹土鉢自而來在其手中阿闍世復問文殊師利是諸菩薩悉從何刹土而來到是其佛號字文殊師利則言其刹土名沙陀惟瞿吒其佛號字惟首陀尸利從彼間而來到是食於仁所以者何故來欲聞法聽仁之所狐疑諸菩薩念鉢應時鉢而飛來行伍而到阿耨達皆自淨洗盛滿其水諸龍嫫女皆擎持二萬三千鉢而來授與瞿吒

利土菩薩人人著其手中阿闍世住侍文殊師利文殊師利則謂阿闍世可分布飯食應時受教分布而徧其食不減如故阿闍世復白其食悉徧無所缺減則復如故文殊師利言今爲盡不則答言不盡所以未盡者以若疑故諸菩薩飯已持鉢掉擲虛空行列而住亦不墮地亦不動搖阿闍世復問是鉢云何住而依何等文殊師利答言是鉢所住如若狐疑所住阿闍世復言是鉢亦無所住處亦不在地亦不所依亦無有處所文殊師利則言如若狐疑亦無所住諸法亦復如鉢無所住無所墮飯事旣訖阿闍世則取一几坐文殊師利前自白言願解我狐疑文殊師利則言若恒邊沙等佛不能爲若說是狐疑阿闍世應時驚怖從几而墮若大樹躡地摩訶迦

惟六

十二

葉謂阿闍世勿恐無懼所以者何文殊師利入漚沍拘舍羅甚深以是故說是徐可而問阿闍世則問言屬所說何所恒邊沙等佛不能說我之所狐疑文殊師利言仁者謂已從心因緣而可見佛王即答言不用心心生故爲可見佛王言不用有心故爲可見佛王言不生死與脫是二事持是作佛王言不而有法言從蒙是法王言不其作如是法者能可爲決說王言不以是故吾說若之狐疑恒邊沙等佛而不能說所以者何若人言我能以塵汙於虛空乃能爲不王言不若有人言我能却虛空之垢能却不王言不能文殊師利言佛之諸法一切悉若虛空所以者何脫於本故亦不見諸法有本若有脫者以故我言若王之狐疑非恒邊沙等佛之所能說文殊

師利復言怛薩阿竭者不得內外心何所當作狐疑所以者何一切諸法本悉脫何以故復有狐疑文殊師利復言其脫本者已不復著空本無所有諸法故曰脫亦不自然不有所成無所不見諸法有所有無所有諸法無所見故無所可見諸法謂默然故是謂想不知知諸法無想已過自然故以過度諸法者謂生死斷故諸法無處所謂無有願故諸法無有願謂無有生死故等諸法無所著謂清淨故諸法悉清淨謂本中外悉淨故諸法無有雙者謂無有侶諸法無有侶謂一心故諸法一心謂脫故諸法無有極謂無所斷故諸法無有邊幅謂無有度故諸法不可見其度者謂所作異故諸法謂所作異者求慧謂不能得安故諸法無常謂無二心故諸法悉安

謂過淨故諸法悉決謂無所求故無自然法謂不可得身故諸法無狐疑謂內寂故奇哉諸法謂無諦故諸法寂者謂怕然故諸法無吾謂無是我所故諸法無餘謂脫故諸法無所轉會上謂無有念故諸法盡信無所著斷故諸法一味謂脫故諸法安隱謂無有相故諸法無有相謂無所懷故諸法悉空度諸求故諸法無有願謂三界故諸法以斷三界謂不著過去當來今現在一切諸法若泥洹謂以生未生者文殊師利謂阿闍世無所生無所生者乃可令淨王言不文殊師利言佛知諸法如泥洹故不可脫其所狐疑所以者何當直住視諸法視諸法已亦無所取無所捨亦不於諸法有所止處已無所止諸法是故安已安者便無有疑已無有疑者便無所有

作無所有作者謂無有主於是中當作是忍何以故不自念我用諸法故忍諸法不可作謂可爲是不可爲諸法無有作無有作無所作是故泥洹其信是者以爲等脫亦無所增亦無所減諸法本無故無有作而能作者悉

惟六

十四

本無其本無者亦非是亦不非是故本無無有異已信無有異者諸狐疑已索盡其眼者亦無垢亦無淨眼之自然是故本無本無自然故曰眼耳鼻口身意亦無有垢亦無有淨其意者自然是故本無本無自然故曰意色亦本無本無自然色痛癢思想生死識亦無有垢亦無有淨識者自然本無本無自然故曰識諸法一切無有垢無有淨諸法自然本無本無自然故曰諸法其心亦不可見色亦不可得持何以故譬若幻不可言用內故亦

不可言用外故所以者何本淨故以是無有垢其心本者亦不以受亦不以增亦不以減亦不以憂亦不以愁聞是法者無所疑本異而念異故而有垢當知本異而念異其無是者不可以令有王不當念有是譬若人言我能令空有垢以煙若塵作是而可令空有垢不王言不文殊師利言其心本以清淨者姪怒癡無來何復言譬若空現於五事一者灰二者塵三者煙四者霧五者雲盡索可見不可言爲空作垢如人言是我所作非我所便有姪怒癡於心本而不作垢亦不作狐疑所以者何心本有所作亦不能防後心後心有所作不礙於前心令現在心亦無處所其智者已曉是所作而不有希望無所希望是故清淨相一切諸法無有垢無所不明無所生

惟六

十五

無有處所無有處所是佛生地生地者謂爲諸法諸法者是故生地故不可說其智慧者諸法無有脫以法爲脫諸疑以無所有無有法度者故狐疑屬法身故曰法身無所不入諸法亦不見法身有所入何以故諸法是法身如諸法等故法身亦等故曰法身所入說是時阿闍世王得所喜信忍則歡喜踊躍則言善哉善哉解我狐疑文殊師利則答是爲大狐疑屬所說諸法無有本何從得狐疑當從何所聞狐疑阿闍世王則言蒙大恩而得小差令我命盡者不憂不至泥洹文殊師利言如王之所希望者是無有本所以者何諸法本泥洹故無所生阿闍世王則從座起取名好奇觀其價直億百千持繞文殊師利身應時文殊師利身不現其觀續在處於虛空

但聞其聲不見形則聞其音說如見文殊師利身王自見狐疑不以見狐疑者爲以見諸法如所見是爲復從空中聞其聲謂王有所見便以觀而與之次文殊師利坐處有菩薩名得上願阿闍世復欲持是觀而奉上之其菩薩言若其求脫泥洹者我不從是有所受亦不受凡人有所有何以故凡人者謂有俗間事故而不受亦不從求羅漢辟支佛有所受亦不從但薩阿竭法有所受其有不近是法不離是法而我受是物其與者亦無二心十六其受者亦無二心故曰所受過於脫王則以衣著菩薩上忽然不現不知處但聞其音不現形說言其所現身以衣與之而是菩薩坐次復有菩薩名曰見諸幻阿闍世王復以是衣如奉上之其菩薩言若有計他人有我者

我不受是物亦不從有所玷汙亦不從以得脫從是而受物亦不從定意者亦不從亂意者而受是物亦不從智慧者亦不從無智慧者而受是物阿闍世便以衣擲牀上其菩薩即不現復聞其音不見其形說言其有現者以衣與之而是菩薩坐處有菩薩名曰不見幻至泥洹阿闍世以手擎衣而往趣之上座已去仁者可受其菩薩言若有自著他人者我不受是物其不著五陰四大六衰亦不著佛亦不著法亦不著僧何以故諸法無所著故王阿闍世便持衣欲著菩薩上應時而不現但聞其音而不現形說言其有現者以衣與之而是坐次有菩薩名曰私呵末阿闍世則以衣奉上其菩薩言其無瞻者我不受物今汝發菩薩意持心如菩薩其心等諸法亦

謹六

十七

等於諸佛法亦無所取無所捨於諸法亦無疑亦無有疑亦不念諸法有我不念諸法有所脫有是意者乃受是物王阿闍世則而以衣著菩薩上應時不現形但聞其音說言其有現者以衣與之而是菩薩坐次有菩薩名三昧拘迦摩阿闍世持衣欲奉上其菩薩言若有如三昧無所疑乃受其物本三昧悉知諸法無所脫我乃受是物王阿闍世便持衣著其上應時不現但聞其音言其有現者以衣與之而是坐次有菩薩名無量精進言一切諸音字聲而不可得其作是者我乃受是物王阿闍世復以衣起著其上則時不現形但聞其音言其有現者以衣與之而是坐次有菩薩名離所作垢阿闍世欲以衣上之是菩薩言其有自念我身與之亦不念有人

從我取亦不念當有利其無是者我乃受是物王復以衣著其上應時不現其形但聞其音言其有現者以衣與之而是坐次有菩薩名曇摩惟瞿和那羅耶阿闍世復以衣奉上之其菩薩言若於聲聞示現而不般泥洹於辟支佛示現而不般泥洹亦不住於生死亦不至泥洹我乃受其物王阿闍世便以衣著其上忽然而不現但聞其音言其有現者以衣與之如是一一以衣與之應時不現其形几坐處悉亦不現復聞其音言其所現者以衣與之阿闍世語摩訶迦葉我從佛聞仁特尊今以衣奉上唯當受之摩訶迦葉而不肯受所以者何我姪怒癡未盡索故不可受亦不離無點亦不離惡亦不離苦知亦不習亦不離亦不導亦不以盡爲證亦不有道念亦

十六

十八

不見但薩阿竭亦不聞法亦不屬比丘僧亦不慧生亦不眼淨亦不以識有所住而作其與我物者其德不能大亦不能得尊脫摩訶迦葉言如仁作意如我者我乃受之王阿闍世便以衣著其上應時而不見但聞其音言其有現者以衣與之便復以衣次第與諸比丘一一不見盡索五百人悉亦不現但聞其音言其有現者以衣與之王阿闍世熟自思念諸菩薩比丘僧悉亡當已衣與誰還自與中宮極夫人其夫人亦不現應時阿闍世王便得三昧不見諸色亦不見母人亦不見男子亦不見男兒亦不見女兒亦不見垣牆亦不見樹木亦不見室宅亦不見城郭尚有餘念謂有我身諸色識悉止復聞其音如一切有所見當自見其狐疑如所見狐疑見一切

諸法亦復如是所見當作是視無所視當作是視無所視法是爲視法其有所見者便以與之王了無所復見便取其衣還欲自著亦復不見其身心意識諸所想已無是名曰脫於想脫於狐疑則從三昧還見衆菩薩比丘

維六

十九

僧諸官屬所有一切如故阿闍世復白文殊師利屬諸衆會所在而我不見文殊師利言如仁之狐疑處屬衆會在彼間文殊師利復言乃見衆會不阿闍世則言云何見如我所見狐疑見衆會如是文殊師利復問乃見衆會不阿闍世則言見云何如我所見狐疑見衆會如是文殊師利復問云何見狐疑如我屬不見衆會者是狐疑於內外亦無所見文殊師利言乃聞佛所言其作逆惡當入大泥犁不王言聞文殊師利復謂王汝自知當入

泥犁不阿闍世復問其佛得佛時乃有法上天入泥犁者不乃有安隱當至泥洹者不文殊師利則言無王言我知諸法悉空故所以者何泥犁亦復已空上天安亦空諸法無所可壞敗是故入法身法身者亦無天上亦無人間亦無泥犁禽獸薜荔其逆者亦不離法身其所作逆者身悉法身之所入諸逆之本悉諸法之本已去當來無去來者諸法亦無去來已知是者亦不入泥犁亦不上天亦不泥洹文殊師利復問佛說有逆如何今說無有王則答言我不違佛所語云何王言無我是佛之說諦其以無我是則無人亦不作罪者亦無受罪者文殊師利復問王已脫於狐疑不則答言從本已脫以來亦脫文殊師利言其疑以盡末王言已從久遠盡文殊師利

復問云何衆會而知王有逆無逆脫是中王
言以專法持我故知無逆譬若菩薩已得忍
辱悉持諸惡菩薩若慧好願那羈頭契耶謂
阿闍世諸逆已淨以得是忍王言一切諸法
悉淨無所玷汙故是法亦不可汙所以者何
其道無有瑕穢故以入大逆道者不去生死
不見泥洹所以者何其道無已可往者而可
近者說是語時阿闍世王便得疾信忍則時
三十二人於文殊師利前皆發阿耨多羅三
耶三菩心五百臣下悉得須陀洹道其羅閱
國民闐滿宮門欲見文殊師利說法文殊師
利則時以足大指按地宮殿及地悉爲瑠璃
一切在外皆見宮中諸菩薩比丘僧若人照
鏡自見其形爾時所視悉亦了了皆聽文殊
師利所說法八萬四千人悉得須陀洹道復

有五百人悉發阿耨多羅三耶三菩心文殊
師利爲王及宮中臣下諸人說法已各令安
隱便從座起與諸菩薩比丘僧俱而出宮門
王阿闍世及宮中官屬俱而送之出於城門
之外見樹下有人而大呼我自殺其母是人
當得脫者文殊師利化作一人與父母俱行
父母言是正道可從是行其子言非是正道
如是至再三與父母共諍便起意還殺父母
前殺呼母者見是人而殺父母便於邊舉聲
而哭與其化人殺父母者便自陳說我所作
爲非法所載怨殺父母其一人則念我獨殺
母耳是人殺父母其罪甚重如子所受我尚
輕微化人則語一人我不如往到佛所佛者
無所歸者而受其歸而無護者而爲作護如
佛所語我當承教不敢違失其化人便向道

其一人即隨其後如是人所受法我亦如是
雖爾我尚嗟之俱共啼哭而行已到佛所前
作禮而住便自白我作非法而妄殺父母佛
言善哉善哉如子之所言至誠無異所以者
何不覆藏其罪故乃至怛薩阿竭前所說如
事佛則言勿恐莫懷隨我所言其化人言如
佛所教唯哀加護佛言還自觀心之法視持
過去當來今現在心持何等心而殺父母佛
則復言已過去心已滅已盡亦不可見處亦
不可見所在當來心不可說所以者何未生
未有故無有故無有想無有念今現在心亦
無所住止若心起意則滅亦不合聚亦不可
知去至何所從何所來亦不可知青亦不知
赤白黃黑心者不可見亦無有形亦復不可
得持亦無有伴譬如幻於身亦不可見在內

亦不見在外亦不見中間佛言心者亦不可
從愛可見亦不可從瞋怒可見若卧出於夢
可見其心若作若無所作心亦無所與無所
得心者本淨故亦無有玷汙亦無有而淨者
佛復言其心亦非是間亦非彼間譬若如幻
不可得持所以者何無伴侶故其知如是者
不作是想亦不念有我無我亦不念有所見
亦不念有所住諸法寂寞無有作者其信是
者不復受惡道所以者何無所玷汙故其心
法者亦無所生亦無所著其化人則言善哉
善哉如怛薩阿竭以法身而自成佛今知如
佛所說以信不疑無作罪者無受罪者無所
生者無所滅者如諸法願樂得爲沙門佛言
如子之願應時其化人便如沙門即白佛我
所犯罪殺父母已脫而得阿羅漢今欲般泥

洹佛言從意如所欲是化比丘飛去地二十丈在於虛空便般泥洹從身火出還自燒身其殺母者見是人已般泥洹具足聞怛薩阿竭所說則自念言其所作甚逆今作沙門而得度脫般泥洹我罪尚可行何爲不自歸佛亦可致是便前爲佛作禮自白我所作非法自殺我母今以身自歸佛言善哉善哉所語至誠無有異所說如言見怛薩阿竭說所作罪而不覆藏且觀心法念以過去當以來今現在心何所心殺其母者過去心以滅盡亦不外亦不內亦無處所當來心不可說亦未生亦未有亦無有想亦無有所想今現在心亦無所住止心有所生則破壞亦無所聚亦不見有所至處亦不可見有所從來處其心者亦不青赤黃白黑其心者無有形不可

惟六

三十一

見不可得持亦不可聽聞所以者何無有聲故亦不可得獲亦無有伴譬若幻亦不於外見身於內亦無所得於中間無有處其心者亦無玷汙亦無有惡亦無有疑其心無所作亦不有所作亦無所與亦無所得心者本淨故亦無玷汙亦復無淨其心亦不在是是其心若空亦不可得獲亦無有伴其智者不念是想亦不作縛亦不作淨不作有所見亦不作處亦不有所止處亦不有而心著脫者是故無所礙亦不生惡處何以故其心法亦無所著亦無所至湊亦不在生死之所止其殺母者應時身諸毛孔一一孔泥犁之火從其孔出痛不可言則自陳說今自歸怛薩阿竭唯哀加護令得安隱佛則時以金手著其人頭上應時火滅苦痛則除便前長跪願

欲作沙門佛言如所欲則時以爲沙門怛薩阿竭以四諦法而說之應時得法眼深入其事則得阿羅漢便白佛言今我欲般泥洹佛言如所欲飛在虛空去地百四十丈便於是上其身火出還自燒身諸天億百千人悉飛而來供養舍利弗白佛怛薩阿竭實尊所以者何而作惡令得解脫誰而解者獨佛若文殊師利及諸菩薩深入僧那僧涅者而知是事非羅漢辟支佛之所而堪知其中事若一切人之所行悉不而及逮佛語舍利弗其怛薩阿竭士者是菩薩之所可忍非羅漢辟支佛地及非一切人之所行所以者何若有一人所作異而當得異如是若曹見作罪者知當入泥犁我而令不入泥犁可至泥洹如若曹所知當有般泥洹者我知當入泥犁何以

惟六

二十四

故若曹而不及知一切人之所行佛語舍利弗若見其殺母人而般泥洹者不則答言見佛言是人以供養五百佛盡索從一一佛聞心法本淨何以故今復聞是法而般泥洹其有知深法入其微妙歡喜踊躍其心無懼若爲惡師所誤若其心不足者而所犯罪會當解脫其以信心法本淨是人墮惡道所以者何無以礙故文殊師利即與諸菩薩摩訶迦葉比丘僧王阿闍世及羣臣官屬來到佛所舍利弗問阿闍世今以聞狐疑解不則答言已聞知云何聞其說法時無所得亦無所不得亦無所持亦無所捨聞是時從今以去無有玷汙時舍利弗問佛阿闍世餘罪有幾所佛言所聞法譬若一芥子能盡須彌山之罪舍利弗問佛王阿闍世當入泥犁不譬若

忉利天子被服名衆好寶來下到是則還處
所阿闍世者亦以衣服珍寶莊嚴譬若是天
子從上來下雖入泥犁泥犁名賓頭入中無
有苦痛則爲苦天子上歸本處舍利弗白佛
甚善阿闍世所作罪而得微輕佛謂舍利弗

惟六

二十五

汝乃知是王不則言不知是阿闍世王以供
養七十三億佛各從諸佛常聞深法其心不
離阿耨多羅三耶三菩心佛復問舍利弗乃
見文殊師利不則言見是本發阿闍世而令
爲阿耨多羅三耶三菩心爾時久遠過去時
有佛號字安隱覺劫名無塵垢用是劫中而
有三億億人皆文殊師利之所勸而轉法輪
佛語舍利弗譬若如恒邊沙等佛爲阿闍世
說法而不解其狐疑所以者何是文殊師利
之所發意故當從是解世世常從文殊師利

聞甚深法佛言菩薩本有所造作其人必當
因本所發意而得解今阿闍世雖入泥犁還
上主天上方去是五百四十五刹土號字名
惟位其佛號字羅陀那羈頭亦於彼當與文
殊師利相得從其刹欲會聞所說法則當得
無所從生法忍彌勤於是作佛阿闍世從彼
刹來生是間爾時當名阿伽佉鉢菩薩彌勤
佛從是因緣以法教諸菩薩所說法亦不過
亦不短適平等爾時當說阿伽佉鉢者以過
去釋迦文佛時有王名阿闍世用惡人言而
殺其父從文殊師利聞諸法聞已則歡喜信
忍所作罪應時盡索彌勤佛說是時八千菩
薩悉得無所從生法忍却後八阿僧祇劫阿
伽佉鉢當行菩薩道而教化人亦當淨刹土
其有人從其聞法者若作聲聞若作辟支佛

若菩薩法者皆當無瑕穢一切無所礙諸人悉當明於智慧無所狐疑其王阿闍世過如所說八阿僧祇劫以後當得爲佛其劫當名唾曰鉢陀遍其刹土名阿迦雲其怛薩阿竭當號字惟首陀惟沙耶爾時壽四小劫當有

惟六

王六

七十萬聲聞悉已從慧得解皆當知八惟務禪爾時當有十二億菩薩一切皆入諸慧曉了漚沍拘舍佛般泥洹以後其法住乃至億萬歲已後乃盡其刹土一切人至死無狐疑者壽終已後不生八惡趣所以者何用從佛聞深法故諸垢濁不復著佛語舍利弗人而不可輕所以者何而從輕得其罪佛言我知人而所作而餘無知者而所趣向其有佛者乃知之舍利弗從其衆會言是事微妙快乃知是則言從今已去不敢復說是者罪人是

者福人所以者何一切人之所行不可議故如佛屬所說阿闍世而得決爾時萬二天子皆發阿耨多羅三耶三菩心各各同願惟首陀惟沙耶作佛時我生其刹土佛悉與決其作佛時而當往生彼刹土王阿闍世有子

年八歲名曰梅檀師利應時取身上珍寶解散佛上則言以是發阿耨多羅三耶三菩心若惟首陀惟沙耶而作佛時我願爲遮迦越羅其佛般泥洹已後我願承其後作佛所散寶物悉化作七寶交露縱廣正等中有座牀

惟六

王七

具足若干之寶其綰綆幃亦復如是佛坐其牀上應時佛笑無央數色光明而從口出遍於十方還繞身三匝從頂上而入阿難從座起白佛怛薩阿竭不妄笑當有意阿難歎佛其智慧甚尊無所罣礙悉知一切人心之所

行隨其所欲教詔令各得所天上天下而獨特尊所因緣笑故唯願欲聞若十方一切人悉在前住一人問億百千那術事悉則發遣而無留難屬之所笑唯聞其說已過去當來今現在佛悉而具足無所罣礙屬之所笑願決其疑其光明悉逾於日月過於釋梵壞諸遮迦和山令一切悉見其光明見其光明者人則無所復著所以者何佛以無瑕穢故屬之所笑唯願發遣佛告阿難是栴檀師利者已供養我而發阿耨多羅三耶三菩心稍而至惟首陀惟沙耶作佛時而生彼刹當作遮迦越羅舉家室僕從當供養其佛比丘僧至竟無有已其佛般泥洹已是兒當襲其後便於遮迦越羅壽盡當至兜術天上從上竟壽而下當生彼佛刹而自成佛號字栴檀

霸尊所有一切如前佛無異其壽適等諸聲聞菩薩亦復適等其從阿闍世所諸餘菩薩悉皆言若文殊師利在所方面亦復如佛無有空時所以者何有所作為與佛無異其有菩薩為文殊師利所教者無所復異何以故無復生於惡處者不畏眾魔亦不畏罪不有所玷汙若城郭郡國縣邑丘聚若有學其法者若有持是經諷誦讀者若書者見是輩人當如見佛無有異在所方面而聞法則當念則是佛處佛謂諸菩薩審如若之所言所以者何已過去無央數阿僧祇劫有佛號字提^{惟六}瑟竭則與我決當為阿耨多羅三耶三菩心而成為佛我以髮布地令怛薩阿竭而蹈之正於是處而得決言汝過阿僧祇劫後而當為佛號字釋迦文時提瑟竭佛謂諸比丘僧

是所受決處不當以足蹈其地所以者何是則極尊神處諸天人民一切當共事是處誰有於是而起塔者應時八十億天皆念言我而起之有迦羅越名毘陀調則自言我欲於是起塔則時便作七寶塔莊嚴甚好事已訖竟至提想竭所自言所作塔已成問怛薩阿竭其福如何提想竭言若菩薩在所處得法忍圓如車輪而起作塔下行盡地際諸天鬼神一切當以其土供養當如舍利無異如是菩薩所受決得法忍處圓如車輪滿中七寶上至三十三天持施與佛有作是塔者其福出是上其佛言如我授摩納決而後當作釋迦文佛汝作是塔因是功德當從釋迦文佛受決却後阿僧祇劫亦當成佛佛語衆會者乃知時迦羅越毘陀調不諸會者不及佛即

漢六

二十九

言今在會中迦羅越子名曰作羅一耶闍是應時怛薩阿竭而與決言汝當作佛號字須陀扇佛復言若比丘比丘尼優婆塞優婆夷而書是經若諷誦讀爲一切人說解其法處圓如車輪塵等下盡地際上至三十三天其智者取中一塵而供養之所以者何菩薩從是法而得忍故佛言若男子女人以七寶滿三千大千佛刹土日三反持是施與但專念是其所復作如是百劫千劫若復至百千劫其有諷誦讀阿闍世品者若恭若事若諷誦爲一切說而解其中慧者其心信向無有異是福出彼所作施與功德上若男子女人於百劫而持淨戒卒聞是法信樂喜心其福出彼淨戒功德上雖爲人所撾捶罵詈百劫亦不起意是爲忍辱其聞是法信向於中作忍

出彼忍辱上於百劫而精進恭事一切人亦不以爲勤苦不惜身命其聞是法信而爲一切人解其中事其福出彼精進上其身於百劫守禪不如以是法而教一切人其功德出彼守禪上若有百劫而行智慧聞是法解心本事淨其功德出彼上諸菩薩皆白佛吾等悉當奉行所至到諸佛刹當以法而化人佛語諸菩薩汝所至奉行法教一切所作如佛無異所以者何是法悉解佛事故一切諸會菩薩悉以華供養散怛薩阿竭上徧三千大千刹土諸菩薩各自說是法實尊其釋迦文佛之所說當久在閻浮利地而與明文殊師利者常當久住所以者何常當從聞深妙之法諸菩薩言慤身末而報其恩佛言若男子女人從人聞是法亦不以身報其恩欲見怛

惟六

三十

薩阿竭者視其男子女人所聞法處當供養如佛其有信於是法者視其人當如見佛諸菩薩從座起爲釋迦文佛作禮於是恍惚而不見各各還其刹土以是法自於處所爲一切具足解說是慧其聞是法者無央數人悉發阿耨多羅三耶三菩心佛語彌勒菩薩持是法當諷誦讀當爲一切廣說其事當加哀天上天下及一切彌勒菩薩白佛我以從過去諸佛所已聞是法持諷誦讀已今復還聞是法今亦當廣爲一切說法雖怛薩阿竭般泥洹已後我在兜術天上若男子女人欲學是法我勸助護之後末世法一切欲盡時其有聞其處所有是經當知我之所護若有魔中道而欲壞敗我當護之令不得其便佛語釋提桓因當持是法諷誦讀決諸狐疑若阿

須倫興師起兵欲來擊天帝當念是經應時得勝其兵即却佛復言若有郡國縣邑丘聚其奉事是經皆當往護其遭縣官者若入縣官者當念是經行賊中當念是經若爲賊所拘繫當念是經若在曠野當念是經若見怨

三

三

家若與怨家相得當念是經其有至心於是法者無而得其便佛語阿難持是法諷誦讀當爲一切說解其法若有男子女人從若聞是法便無狐疑諸狐疑索盡則不復爲罪所覆亦不爲生死之所覆亦不中道離法之所覆一切其有作邪道者則爲不行終不與魔事而相當值所以者何用聞是法故其已作逆惡者聞是法信樂喜則已無逆惡亦不受逆之罪摩訶迦葉白佛我證知是法屬文殊師利於阿闍世所食時說是法解作逆惡之

事應時得歡喜信忍悉爲解狐疑我今說之其有犯逆者從是法忍悉得解脫亦當如阿闍世應時摩訶迦葉復言一切人本悉淨而自作反是我所非我所亦不自知其本淨悉以曉了本淨者所作罪則解脫無有而知如阿闍世者是以一切愚人所作及還自殺身便因是而得勤苦便入泥犁摩訶迦葉言其奉事信樂是法吾等證之不復墮惡道佛言如汝之所說一切諸佛菩薩心無瑕穢阿難復白佛唯怛薩阿竭令後世人見是法怛薩阿竭應時從身之相放光明照無央數佛刹諸垣牆樹木皆有音聲其法當爾所以者何若劫盡火起其當聞者會聞是法若當聞是法雖在於海中會還得聞是法佛語阿難如垣牆樹木之所聞聲審如其言其已作功

德者已作摩訶衍者後世皆還得聞是法說
 是經時諸天及人九萬六千悉得須陀洹道
 七萬八千人悉發阿耨多羅三耶三菩心二
 千菩薩得無所從生法樂忍八千人皆得阿
 羅漢道是三千大千刹六反震動衆冥悉開
 闢而悉明諸欲天子諸色天子以若干妓樂
 而供養之皆以天華天香共散之言所謂法
 輪聞是法者已爲逮法輪轉諸外道者聞是
 法即而自知是故因爲伏是者則菩薩印其
 得是印者乃到佛樹下佛說是經王阿闍世
 諸菩薩文殊師利是爲本諸聲聞舍利弗摩
 訶目捷連阿難等是其本諸天捷陀羅一切
 人聞佛所說前已頭面作禮而去
 佛說阿闍世王經下
 音釋

恍忽恍忽往切恍忽 羅毗拘連梵語也此云
 鉍篇切 惟位梵語也此 羅陀那羈頭梵語也此
 云寶唾曰鉍陀遍梵語也此 阿迦雲梵語也此
 好藥惟首陀惟沙耶梵語也此 幢梵語也此
 王藥惟首陀惟沙耶梵語也此 幢梵語也此
 幢謂之梵語也此 幢梵語也此 幢梵語也此
 裳幃梵語也此 幢梵語也此 幢梵語也此